



An Roinn Oideachais
agus Óige
Department of Education
and Youth

Sonraíocht Churaclaim le haghaidh Thíreolaíocht na hArdteistiméireachta

Le tabhairt isteach i scoileanna ó Mheán Fómhair 2026.

Ullmhaithe ag an gComhairle Náisiúnta Curaclaim agus Measúnachta (CNCM)

An Clár Ábhar

An tSraith Shinsearach	2
Réasúnaíocht	4
Aidhmeanna	4
Leanúnachas agus dul chun cinn	5
Foghlaim an scoláire sa tSraith Shinsearach	6
Príomhinniúlachtaí	7
Snáitheanna staidéir agus torthaí foghlama	10
Snáithe Aontaitheach: Smaointeoireacht agus scileanna tíreolaíocha a chur i bhfeidhm	12
Snáithe 1: An timpeallacht fhisiciúil	14
Snáithe 2: An timpeallacht dhaonna	17
Snáithe 3: An timpeallacht dhomhanda	19
Teagasc le haghaidh fhoghlaim an scoláire	21
Measúnú	22
Socruithe réasúnta	25
Aguisín 1: Gluais de bhriathra gnímh	27

An tSraith Shinsearach

Tá sé mar aidhm ag an tsraith shinsearach leanúint le hoideachas iomlánaíoch a chur ar an duine agus cur le rath an duine. Cuireann eispéiris na scoláirí le linn na sraithe sinsearaí lena bhforbairt intleachtach, shóisialta agus phearsanta mar aon lena sláinte agus a bhfolláine ar bhonn ginearálta. Baineann ocht dtreoirphrionsabal leis an tsraith shinsearach.

Treoirphrionsabail na Sraithe Sinsearaí

Folláine agus caidreamh

Oideachas ionchuimsitheach agus éagsúlacht

Dúshlán, rannpháirtíocht agus cruthaitheacht

Foghlaim le foghlaim, foghlaim don saol

Rogha agus solúbthacht

Leanúnachas agus aistrithe

Rannpháirtíocht agus saoránacht

Timpeallachtaí foghlama agus comhpháirtíochtaí

Is slat tomhais iad na prionsabail seo do scoileanna agus do shuíomhanna oideachais eile agus a sraith shinsearach á dearadh acu. Cuimsítear leis an tsraith shinsearach, Idirbhliain roghnach agus cúrsa dhá bhliain ina diaidh, a bhfuil ábhair agus modúil mar chuid de. Tarlaíonn an fhoghlaim i scoileanna, pobail, suíomhanna oideachasúla agus suíomhanna eile lena n-aithnítear neamhspleáchas méadaitheach na scoláirí, ag tógáil ar an tsraith shóisearach. Bunaítear caidrimh le múinteoirí ar bhonn níos aibí agus glacann scoláirí níos mó freagrachta orthu féin as a gcuid foghlama féin.

Sa tsraith shinsearach, cuirtear curaclam ar fáil ina mbíonn dúshlán do na scoláirí an leibhéal is airde de ghnóthachtáil oideachasúil a bheith mar sprioc acu, i gcomhréir lena gcuid inniúlachtaí agus cumas féin. I gcaitheamh na sraithe sinsearaí, bíonn deiseanna ag na scoláirí dul i ngleic le dúshlán shóisialta, chomhshaoil, eacnamaíocha agus teicneolaíochta, agus chun feabhas a chur ar a dtuiscint ar chearta an duine, ar cheartas sóisialta, ar chothroime, ar éagsúlacht agus ar inbhuanaitheacht. Tugtar tacaíocht do na scoláirí chun roghanna bunaithe ar eolas a dhéanamh agus conairí éagsúla tríd an tsraith shinsearach á roghnú acu agus bíonn deiseanna ag gach scoláire lúcháir agus sásamh a bhaint as clocha míle móra a bhaint amach ina gcuid oideachais. Ba cheart go gcuirfeadh an tsraith shinsearach bonn láidir faoin aistriú go dtí an breisoideachas, an t-oideachas aosach agus an t-ardoideachas, printíseachtaí, tréimhsí oiliúna agus fostaíocht, agus rannpháirtíocht bhríoch sa tsochaí, sa gheilleagar agus sa saol aosach.

Ba cheart go bhfreastalódh an t-eispéireas oideachasúil sa tsraith shinsearach ar gach aon scoláire, go bhfreagródh sé dá gcuid láidreachtaí agus riachtanas foghlama, agus go mbeadh meas agus urraim ann don éagsúlacht agus go ndéanfaí sin a cheiliúradh. Bíonn éagsúlachtaí ann i measc scoláirí ó thaobh cúlra teaghlaigh agus cultúir de agus i dtaca le teangacha, aois, stádas eitneach, creideamh,

inscne, agus féiniúlacht ghnéis agus maidir lena gcuid láidreachtaí, riachtanas, spéiseanna, inniúlachtaí agus réamheolais, scileanna, luachanna agus meonta. Ba cheart go ndéanfaí féiniúlacht gach aon scoláire a cheiliúradh, go léireofaí meas uirthi agus go bhfreagrófaí di le linn don scoláire a bheith ag dul tríd an tsraith shinsearach.

Ar leibhéal praiticiúil, tacaítear leis an tsraith shinsearach le forbairt ghairmiúil bhreisithe; le rannpháirtíocht múinteoirí, scoláirí, tuismitheoirí, ceannairí scoile agus páirtithe leasmhara eile; acmhainní; taighde; cumarsáid shoiléir; comhsheasmhacht polasaí; agus le fíis chomhroinnte i dtaca lena mbítear ag iarraidh a bhaint amach dár gcuid daoine óga tríd an tsraith shinsearach, agus iad ag réiteach chun tús a chur leis an saol aosach. Cuirtear beocht inti i scoileanna agus i suíomhanna eile oideachasúla trí:

- pleanáil, forbairt, eagrú, machnamh agus measúnú éifeachtach curaclaim
- cuir chuige teagaisc agus foghlama a spreagann na scoláirí agus a ligeann dóibh feabhsú
- cultúr scoile ina léirítear meas ar na scoláirí agus ina gcuirtear grá don fhoghlaim chun cinn.

Réasúnaíocht

Baineann an Tíreolaíocht leis an Domhan, lena phobail agus leis na hidirghníomhaíochtaí eatarthu. Is disciplín eolaíochta agus daonnachtaí ilghnéitheach í ina mbaintear úsáid as modheolaíochtaí cáilíochtúla agus cainníochtúla chun an domhan fisiciúil agus daonna a fhiosrú.

Tugann **Tíreolaíocht na hArdteistiméireachta** eolas, scileanna, luachanna agus meonta ábhartha agus inaistrithe do scoláirí. Tríd an staidéar, tacaítear leis na scoláirí smaoineamh ar a gcuid eispéireas tíreolaíochta pearsanta, an t-ómós áite atá acu a neartú, agus tuiscint idirchultúrtha a fhorbairt. Éiríonn siad níos léannta ó thaobh na tíreolaíochta de agus tá siad in ann tuiscint a fháil ar idirghníomhaíochtaí, idirnaisc agus impleachtaí na gcinntí a mhúnlaíonn na timpeallachtaí nádúrtha agus daonna atá thart orainn. Tacaítear leo agus iad ag anailísiú agus ag measúnú dúshláin eacnamaíochta, timpeallachta agus shóisialta agus na bhfreagraí ar na dúshláin sin.

Trí Thíreolaíocht na hArdteistiméireachta, téann na scoláirí i ngleic le príomhchoincheapa. Forbraíonn siad tuiscint iomlánaíoch ar próisis ar scálaí éagsúla. Cuirtear ar chumas na scoláirí páirt ghníomhach a ghlacadh ina bhfoghlaim agus í a chur i bhfeidhm trí smaointeoireacht thíreolaíoch agus scileanna a fhorbairt. Cuireann siad ceisteanna faoin tíreolaíocht, agus déanann siad fiosrúcháin thíreolaíocha a phleanáil, a chur i bhfeidhm agus a mheasúnú. Anailísíonn siad sonraí, sintéisíonn siad iad agus cuireann siad in iúl iad.

Leis an tíreolaíocht, tacaítear le forbairt scileanna amhail an smaointeoireacht chriticiúil agus réiteach fadhbanna. Cuireann na scileanna sin ar chumas na scoláirí cinntí agus breithiúnais fhianaisebhunaithe a dhéanamh, agus freagraí cruthaitheacha agus inbhuanaithe ar dhúshláin chasta na tíreolaíochta a shainaithint agus a fhiosrú. Cuidíonn an tíreolaíocht leis na scoláirí forbairt mar shaoránaigh eolacha, agus cuireann sí ar a gcumas cinntí eiticiúla, inbhuanaithe atá dírithe ar an todhchaí a dhéanamh agus a mbealach a dhéanamh tríd an saol atá casta agus idirnasctha.

Aidhmeanna

Is é aidhm Thíreolaíocht na hArdteistiméireachta tuiscint na scoláirí ar an Domhan agus a phobail a fhorbairt, chomh maith lena spéis i dtábhacht phraiticiúil na tíreolaíochta agus a léirithuiscint di. Tacaítear leis na scoláirí le bheith ag smaoineamh ar nós tíreolaí agus scileanna tíreolaíocha a chur i bhfeidhm, chun tuiscint níos fearr a fháil ar an domhan agus chun cuidiú le todhchaí níos inbhuanaithe a mhúnlú ó thaobh eolais chriticiúil de.

Ar bhonn níos sonraí, cuireann Tíreolaíocht na hArdteistiméireachta ar chumas na scoláirí:

- na hidirghníomhaíochtaí idir próisis fhisiciúla agus dhaonna a shainaithint, a anailísiú agus a mheasúnú go criticiúil
- scileanna smaointeoireachta agus fiosrúcháin tíreolaíochta a fhorbairt, a úsáid agus a chur i bhfeidhm
- tuiscint a fhorbairt ar choincheapa atá fíorthábhachtach do dhisciplín na tíreolaíochta
- tuiscint a fháil ar chastacht na bhfórsaí a mbíonn tionchar acu ar an scála áitiúil, réigiúnach, náisiúnta, idirnáisiúnta agus domhanda
- plé le sonraí agus faisnéis ó réimse foinsí iontaofa
- úsáid a bhaint as cinnteoireacht agus breithiúnais fhianaisebhunaithe chun freagraí cruthaitheacha agus inbhuanaithe ar dhúshláin eacnamaíocha, timpeallachta agus shóisialta a fhiosrú.

Leanúnachas agus dul chun cinn

Tógann Tíreolaíocht na hArdteistiméireachta ar an eolas, ar na scileanna, ar na luachanna agus ar na meonta a eascraíonn ó oideachas na bhfoghlaiméoirí ón gcóras luathóige go dtí an tsraith shóisearach san iar-bhunscoil. Cé go gcuireann Tíreolaíocht na hArdteistiméireachta leanúnachas agus dul chun cinn san oideachas tíreolaíocht ar fáil, níl sé riachtanach staidéar a bheith déanta ar an ábhar sa tsraith shóisearach sula ndéantar Tíreolaíocht na hArdteistiméireachta.

An tSraith Shóisearach

Is é is aidhm le Tíreolaíocht na Sraithe Sóisearaí cur ar chumas na scoláirí a bheith eolach ar an tíreolaíocht, fiosracht an scoláire a mhúscailt, agus deiseanna a chur ar fáil do na scoláirí a bheith rannpháirteach lena ngarthimpeallacht agus leis an domhan mór. Forbraíonn na scoláirí eolas, scileanna, luachanna agus iompar a ligeann dóibh fiosrú a dhéanamh ar an domhan fisiciúil, ar ghníomhaíochtaí an duine agus ar an gcaoi a ndéanaimid teagmháil leis an domhan agus idirnaisc, idirghníomhaíochtaí agus impleachtaí a aithint. Cuirtear ar a gcumas an domhan a fhiosrú agus a dtuiscint trí dhearcadh na tíreolaíochta agus spreagtar iad le tairbhe luachmhar agus eiticiúil a dhéanamh dá bpobal, dá gceantar agus dá dtír trí scileanna inaistrithe a fhorbairt, an smaointeoireacht chriticiúil, comhoibriú agus cumarsáid san áireamh.

Cuireann an fhoghlaim agus na heispéiris le hábhair agus gearrchúrsaí na sraithe sóisearaí eile – mar shampla Staidéar Gnó, Stair, Eolaíocht agus Oideachas Saoránach, Sóisialta agus Polaitiúil (OSSP) – go mór le staidéar na scoláirí ar an tíreolaíocht.

I ndiaidh na Sraithe Sinsearaí

Trí staidéar Thíreolaíocht na hArdteistiméireachta, tá na scoláirí níos ullmhaithe do ghnáthimeachtaí an tsaoil. Neartaíonn siad a gcuid tuisceana agus feasachta ar spás, forbraíonn siad tuiscint idirchultúrtha, agus faigheann siad léirthuisceant d'ádhéar áitiúil agus tairbhe á baint acu as. Agus iad ag forbairt a smaointeoireachta eolaíche, cuireann siad feabhas ar a bhfeasacht agus a n-anailís ar fhirinní an tsaoil, ón leibhéal áitiúil go dtí an leibhéal domhanda. Trína scileanna tíreolaíochta a chur i bhfeidhm, tá na scoláirí in ann réitigh a chur i gcrích le haghaidh todhchaí inbhuanaithe ar bhealach níos fearr.

Mar ábhar a chuireann le disciplíní eile agus a chuireann eolas, scileanna, luachanna agus meonta inaistrithe ar fáil, cruthaíonn an tíreolaíocht bunús fíormhaith do na scoláirí atá ag bogadh isteach i mbreisoideachas agus i mbreisoiliúint, san ardoideachas agus sa saol oibre. Cuireann Tíreolaíocht na hArdteistiméireachta bunchloch ar fáil do na scoláirí maidir le raon leathan gairmeacha spreagúla agus fiúntacha, lena n-áirítear an ailtireacht, anailís ar shonraí, bainistiú acmhainní, an eolaíocht talmhaíochta, na heolaíochtaí, an fuinneamh inbhuanaithe, an fhiontraíocht, an ghairneoireacht, an innealtóireacht, an t-oideachas, oidhreacht na timpeallachta, an phleanáil uirbeach, an pholaitíocht, an teicneolaíocht, tógáil agus an turasóireacht.

Foghlaim an scoláire sa tSraith Shinsearach

Cuimsítear le foghlaim an scoláire sa tsraith shinsearach, gach rud a fhoghlaimíonn na scoláirí **laistigh** de na hábhair agus na modúil a nglacann siad páirt iontu **agus** gach rud a fhoghlaimíonn na scoláirí ag a bhfuil baint lena n-eispéiris sraithe sinsearaí **ar fad**. Is é an phríomhaidhm anseo ná go mbeidh gach scoláire níos saibhre, níos rannpháirtí agus níos inniúla mar dhaoine ag deireadh na sraithe sinsearaí ná mar a bhí siad sular thosaigh siad an tsraith shinsearach.

Ar mhaithe le soiléireacht, tugtar breac-chuntas faoin teideal ‘príomhinniúlachtaí’ ar an bhfoghlaim a bhaineann lena n-eispéiris **ar fad** sa tsraith shinsearach. Tugtar breac-chuntas ar an bhfoghlaim a tharlaíonn **laistigh** d’ábhar nó modúl sonrach faoin gceannteideal ‘snáitheanna agus torthaí foghlama’. Ach tá sé rithábhachtach a aithint go bhforbraítear príomhinniúlachtaí agus foghlaim ábhair nó mhodúil go comhtháite. Tá na príomhinniúlachtaí comhtháite ar fud na réasúnaíochta, na n-aidhmeanna, na dtorthaí foghlama agus ar fud ranna measúnaithe na sonraíochtaí. Go praiticiúil, is iad na scoláirí a fhorbraíonn príomhinniúlachtaí ar scoil trí na hoideolaíochtaí a úsáideann múinteoirí, agus an timpeallacht a fhorbraíonn siad ina seomraí ranga

agus laistigh dá scoil. D’fhéadfadh na hábhair a bheith cabhrach do scoláirí a bpríomhinniúlachtaí a fhorbairt; agus is féidir leis na príomhinniúlachtaí foghlaim ábhair níos doimhne a fheabhsú agus a éascú. Nuair a tharlaíonn an comhtháthú seo, bainfidh na scoláirí tairbhe as:

- le linn agus i gcaitheamh na sraithe sinsearaí
- le linn dóibh aistriú chuig gnéithe éagsúla i mbreisoideachas, oideachas aosach agus an t-ardoideachas, printíseachtaí, tréimhsí oiliúna agus fostaíocht, agus
- ina saol mar dhaoine fásta le linn dóibh caidrimh a bhunú agus a chothú le réimse leathan daoine agus páirt iomlán a ghlacadh sa tsochaí.

Nuair a dhéanann múinteoirí agus scoláirí ceangail idir modhanna teagaisc a bhíonn in úsáid don scoláire, na hinniúlachtaí atá á bhforbairt acu agus na bealaí ar féidir leis na hinniúlachtaí sin foghlaim shainiúil ábhair na scoláirí a dhoimhniú, éiríonn na scoláirí níos feasaí ar na bealaí ar fad a gcuireann a n-eispéiris ar fud na sraithe sinsearaí lena bhforbairt iomlánaíoch mar dhaoine.


Príomhinniúlachtaí

Is scáth-théarma é Príomhinniúlachtaí ina ndéantar tagairt don eolas, na scileanna, na luachanna agus na meonta a fhorbraíonn na scoláirí ar bhealach imeasctha le linn na sraithe sinsearaí.



Fíor 1: Comhpháirteanna na bpríomhinniúlachtaí agus an tionchar a mhianaítear leo

Tugtar breac-chuntas ar an eolas a bhaineann go sonrach leis an ábhar seo thíos faoin teideal ‘snáitheanna staidéir agus torthaí foghlama’. Comhtháthaítear an t-eolas eipistéimeach ar fud na n-ábhar agus na modúl sna príomhinniúlachtaí.



Fíor 2: Príomhinniúlachtaí sa tSraith Shinsearach, lena dtacaíonn litearthachtaí agus uimhearthacht

Tá na scileanna seo nasctha le chéile agus is féidir iad a chónascadh; is féidir leo feabhas a chur ar fhoghlaim fhoriomlán na scoláirí; is féidir leo cabhrú leis na scoláirí agus leis na múinteoirí naisc bhríocha a dhéanamh idir agus thar réimsí éagsúla foghlama; agus tá tábhacht ag baint leo tríd an gcraclam go léir.

Cuireann forbairt litearthachtaí agus uimhearthacht na scoláirí le forbairt na n-inniúlachtaí agus an bealach eile thart. Tacaítear leis na príomhinniúlachtaí nuair a dhéantar litearthacht agus uimhearthacht na scoláirí a fhorbairt go maith agus nuair is féidir leis dea-úsáid a bhaint as uirlisí éagsúla, teicneolaíochtaí ina measc, chun tacú lena gcuid foghlama.

Cuirtear beocht sna príomhinniúlachtaí trí na heispéiris foghlama agus na hoideolaíochtaí a roghnaíonn múinteoirí agus trí fhreagairtí na scoláirí orthu. Is féidir agus ba cheart go gcabhrófaí leis na scoláirí a gcuid príomhinniúlachtaí a fhorbairt, beag beann ar a gcúlra, ar a gcuid cúinsí nó ar a gcuid eispéireas, faoi láthair nó roimhe seo, agus ba cheart go mbeadh neart deiseanna acu a bpríomhinniúlachtaí a léiriú. Tá tuilleadh sonraí maidir leis na príomhinniúlachtaí ar fáil ar <https://ncca.ie/ga/an-tsraith-shinsearach/athfhorbairt-na-sraithe-sinsearaí/príomhinniúlachtaí-an-scolaire/>

Mar shampla, forbraíonn na scoláirí inniúlachtaí a bhaineann leis an **smaointeoireacht agus réiteach fadhbanna** ina n-anailís ar phatrúin, amhail patrúin a bhaineann leis an turasóireacht in Éirinn. Le béim ar shonraí tíreolaíocha a bhailiú, a léirmhíniú, a anailísiú agus a shintéisiú, neartaítear cumas an duine óig treochtaí a shainaithint nó smaointe nua a fhorbairt. Nuair a thugtar faoi straitéisí bainistíochta acmhainní, foghlaimíonn na scoláirí a gcuid eolais a chur i bhfeidhm maidir le dúshlán phraiticiúla, amhail tuilte nó pleanáil uirbeach. Nuair a anailísíonn agus nuair a mheasúnaíonn siad freagairtí a bhaineann cothromaíocht amach idir tosca eacnamaíocha, timpeallachta agus sóisialta, bíonn na scoláirí níos ábalta a gcuid cinntí eolacha, eiticíúla agus inbhuanaithe féin a dhéanamh.

Le linn a staidéir ar Thíreolaíocht na hArdteistiméireachta, tacaítear leis na scoláirí inniúlacht **an rannpháirteachais sa tsochaí** a fhorbairt trí dhul i ngleic le ceisteanna atá ábhartha do dhaoine óga, amhail an imirce nó teannas geopholaitiúil. Chomh maith leis sin, forbraíonn siad a gcuid smaointe bunaithe ar fhianaise agus an inniúlacht a dtuairimí a léiriú i bplé faoi dhúshlán áitiúla, réigiúnacha, náisiúnta, idirnáisiúnta agus dhomhanda, amhail iad siúd a bhaineann leis an timpeallacht fhisiciúil, leis an domhandú nó le forbairt. Leis sin méadaítear ar a gcumas critíc a dhéanamh ar an status quo agus é a cheistiú, moltaí a dhéanamh agus tionchar a imirt maidir le múnú freagraí claochlaitheacha i dtreo todhchaí atá níos inbhuanaithe agus níos cothroime. Tríd an staidéar, faigheann na scoláirí tuilleadh eolais maidir le héagsúlacht daoine agus áiteanna, agus faigheann siad deiseanna chun an t-ómós áite atá acu agus a gcuid tuisceana idirchultúrtha a neartú.

Agus iad ag fiosrú ábhair éagsúla amhail an aimsir agus an t-atmaisféar, lonnú, talmhaíocht agus iascaigh, neartaíonn na scoláirí a gcuid tuisceana agus cumais maidir le **lítearthachtaí agus uimhearthacht** agus **cumarsáid**. Tugann Tíreolaíocht na hArdteistiméireachta deis uathúil do na scoláirí réimse leathan sonraí tíreolaíochta ó fhoinsí éagsúla a anailísiú, agus iad a léirmhíniú, chun a gcuid sonraí fiosrúcháin féin a ghiniúint, chun machnamh criticiúil a dhéanamh ar réimse dearcthaí, mothúchán, luachanna agus ceisteanna casta tíreolaíochta. Agus iad ag plé le heolas, amhail cás-staidéir, léarscáileanna, grianghraif, graif agus sonraí geospásúla, baineann na scoláirí leas as an teicneolaíocht chun tacú lena gcuid foghlama agus cuireann a gcuid tuisceana agus a stíl chumarsáide in oiriúint do chomhthéacsanna difriúla. Bídis ag cur in iúl a dtuairimí eolacha faoi thionchar bolcán nó ag plé freagairtí inbhuanaithe ar dhúshlán thíreolaíocha, déanann na scoláirí cleachtadh ar eolas a chur in iúl, argóint agus smaointe a chur ina luí ar dhaoine eile go héifeachtach.

Snáitheanna staidéir agus torthaí foghlama


Ceapadh an tsonraíocht seo do Thíreolaíocht na hArdteistiméireachta le haghaidh 180 uair an chloig d'am ranga ar a laghad.

Tá ceithre shnáithe i sonraíocht Thíreolaíocht na hArdteistiméireachta: Snáithe Aontaitheach, Smaointeoireacht agus scileanna tíreolaíocha a chur i bhfeidhm, agus trí shnáithe chomhthéacsúla, An timpeallacht fhisiciúil, An timpeallacht dhaonna, agus An timpeallacht dhomhanda. Ba cheart a thabhairt faoi deara go dtiocfaidh na scoláirí ar fhoghlaim an disciplín atá leagtha amach sa Snáithe Aontaitheach agus go gcuirfidh siad i bhfeidhm í ar bhealach comhtháite

agus rannpháirt á glacadh acu san fhoghlaim sna trí shnáithe chomhthéacsúla ar leith agus eatarthu.

Tugtar breac-chuntas i bhFíor 3 ar struchtúr shnáitheanna Thíreolaíocht na hArdteistiméireachta:

- Smaointeoireacht agus scileanna tíreolaíocha a chur i bhfeidhm (Snáithe Aontaitheach)
- An timpeallacht fhisiciúil (Snáithe 1)
- An timpeallacht dhaonna (Snáithe 2)
- An timpeallacht dhomhanda (Snáithe 3)



Fíor 3: Snáithe Thíreolaíocht na hArdteistiméireachta

Tugtar achoimre scéil ar gach snáithe thíos, agus tábla ina ndiaidh. Sa cholún ar dheis, tá torthaí foghlama a dhéanann cur síos ar an eolas, na scileanna, na luachanna agus na meonta ba cheart a bheith ar chumas na scoláirí i ndiaidh tréimhse foghlama. Cé go bhfuil uimhreacha ar na torthaí foghlama, is ar mhaithe le héascaíocht a dhéantar é sin agus ní thugann sé ordlathas cur chuige le tuiscint. Sa cholún ar chlé, déantar cur síos ar réimsí ar leith faoina bhfoghlaimíonn na scoláirí. I dteannta a chéile, cuirfidh siad seo soiléireacht agus comhleanúnachas leis na codanna eile den tsonraíocht ar fáil. Leagtar amach in Aguisín 1 gluais de na briathra gnímh atá in úsáid sna torthaí foghlama.

Ba cheart go bhféadfadh gach scoláire na torthaí foghlama a bhaint amach, ar a leibhéal mianach agus cumas féin. Cuireann torthaí foghlama próisis teagaisc agus foghlama chun cinn a fhorbraíonn eolas, scileanna, luachanna agus meonta na scoláirí de réir a chéile, rud a chuireann ar a gcumas a bpríomhinniúlachtaí a chur i bhfeidhm ar chásanna difriúla de réir mar a théann siad chun cinn. Rachaidh na scoláirí atá ag déanamh staidéar ar an ngnáthleibhéal agus ar an ardleibhéal araon go criticiúil i mbun na dtorthaí foghlama uile i sonraíocht na tíreolaíochta, ach beidh an comhthéacs, an fhaisnéis agus na torthaí a eascróidh as an rannpháirtíocht sin éagsúil lena chéile.

Gnáthleibhéal	Ardleibhéal
Téann na scoláirí i ngleic le raon leathan eolais tíreolaíoch, atá nithiúil den chuid is mó, ach a chuireann roinnt príomh-choincheap tíreolaíochta i bhfeidhm.	Téann na scoláirí i ngleic le raon leathan eolais tíreolaíoch, lena n-áirítear cur i bhfeidhm coincheap teoiriciúil agus smaointeoireachta teibí, le doimhneacht shuntasach i roinnt réimsí.
Taispeánann na scoláirí cur i bhfeidhm na smaointeoireachta tíreolaíche maidir le dúshlán agus freagairtí eacnamaíocha, timpeallachta agus sochaí.	Taispeánann na scoláirí cur i bhfeidhm éifeachtach na smaointeoireachta tíreolaíche maidir le dúshlán agus freagairtí eacnamaíocha, timpeallachta agus sochaí.
Taispeánann agus úsáideann na scoláirí réimse measartha scileanna chun fiosruithe tíreolaíocha a phleanáil, a dhéanamh, a mheasúnú agus a bhreithniú.	Taispeánann agus úsáideann na scoláirí réimse leathan sainscileanna chun fiosruithe tíreolaíocha a phleanáil, a dhéanamh, a mheasúnú agus a bhreithniú.
Forbraíonn na scoláirí scileanna grafachta agus taighde chun faisnéis agus sonraí a ghiniúint, a anailísiú agus a shintéisiú le torthaí a chur in iúl agus le tátail a bhaint as ceisteanna a chuir siad féin agus cinn a chuir daoine eile.	Forbraíonn, taispeánann agus úsáideann na scoláirí scileanna grafachta agus taighde chun faisnéis agus sonraí cuí a ghiniúint, a anailísiú agus a shintéisiú go héifeachtach le torthaí a chur in iúl agus le tátail bhailí a bhaint as ceisteanna a chuir siad féin agus cinn a chuir daoine eile.

Tábla 1: Dearadh torthaí foghlama don ghnáthleibhéal agus don ardleibhéal

Snáithe Aontaitheach: Smaointeoireacht agus scileanna tíreolaíocha a chur i bhfeidhm

Is Snáithe Aontaitheach é ‘Smaointeoireacht agus scileanna tíreolaíocha a chur i bhfeidhm’, ina bhforbraítear an fhoghlaim ó choincheap na Feasachta Tíreolaíochta ón tSraith Shóisearach agus gnéithe comhthéacsúla próiseas, patrún, córas agus scála; scileanna tíreolaíocha; agus inbhuanaitheacht. Tacaíonn an Snáithe Aontaitheach leis na scoláirí a n-eolas disciplín a fhorbairt, lena n-áirítear a dtuiscint ar thréithe an eolais thíreolaíoch agus ar an gcaoi a ngintear sin agus an chaoi a gcuirtear in iúl é trí fhiosrúchán.

Cuirfidh na scoláirí na torthaí foghlama atá leagtha amach sa Snáithe Aontaitheach i bhfeidhm ar bhealach comhtháite le linn a bhfoghlama sna trí shnáithe

chomhthéacsúla: Snáithe 1: An timpeallacht fhisiciúil, Snáithe 2: An timpeallacht dhaonna, Snáithe 3: An timpeallacht dhomhanda.

Tríd an bhfoghlaim ar a dtugtar breac-chuntas sa Snáithe Aontaitheach, forbróidh scoláirí tuiscint ar luach agus tábhacht na smaointeoireachta tíreolaíche, agus ar an mbealach a bhféadfadh an tíreolaíocht cur le tuiscint a fháil ar dhúshláin eacnamaíocha, timpeallachta agus shóisialta agus freagairt orthu. Forbróidh siad a gcuid scileanna grafachta tuilleadh, ceapfaidh siad ceisteanna, beidh siad páirteach i nginiúint sonraí agus faisnéise; agus forbróidh siad pleanáil, déanamh, measúnú agus cur in iúl mar chuid dá bhfiosruithe tíreolaíocha.

Snáithe Aontaitheach: Torthaí Foghlama

Foghlaimíonn na scoláirí faoin méid seo a leanas Ba cheart go mbeadh sé ar chumas na scoláirí

Luach agus tábhacht na tíreolaíochta • raon dhisciplín na tíreolaíochta • tábhacht dearcaidh thíreolaíoch agus ceisteanna tíreolaíocha • inoiriúnaitheacht agus inaistritheacht scileanna tíreolaíocha • smaointeoireacht agus scileanna tíreolaíocha, lena n-áirítear iad siúd a bhaineann le fiosrúchán agus teicneolaíochtaí geospásúla sa phleanáil agus cinnteoireacht eacnamaíoch, timpeallachta agus shóisialta	A1 léirithuiscint a fháil do chineál, fairsinge agus luach na tíreolaíochta A2 cur i bhfeidhm agus ról na smaointeoireachta agus scileanna tíreolaíocha sa saol réadúil a aithint
Príomhchoincheapa sa Tíreolaíocht • coincheapa lena n-áirítear: • athrú le himeacht aimsire • idirghníomhaíochtaí • idirnaisc • impleachtaí • suíomh • patrúin • áit • cumhacht agus tionchar • próiseas • scála • dáileadh spáis • inbhuanaitheacht • córais • réigiún	A3 tuiscint a thaispeáint ar phríomhchoincheapa na tíreolaíochta

Fiosrúchán agus scileanna tíreolaíocha

- ceisteanna tíreolaíocha amhail Cén duine, Cén rud, Cén áit, Cathain agus Conas
- baineann an méid seo a leanas le fiosruithe tíreolaíocha:
 - ceist(eanna) taighde a cheapadh
 - pleanáil
 - bailiú sonraí
 - na sonraí a anailísiú
 - tátail a bhaint
 - torthaí a chur in iúl
 - measúnú agus machnamh
- taighde ag an deasc agus allamuigh, ceisteanna eiticiúla, sábháilteachta agus inbhuanaitheachta ina measc
- sonraí agus faisnéis thíreolaíoch, lena n-áirítear:
 - sonraí príomhúla agus tánaisteacha
 - sonraí cáilíochtúla agus cainníochtúla
 - aerghrianghraif agus íomhánna satailíte
 - cineálacha éagsúla íomhánna
 - cineálacha éagsúla léarscáileanna ar réimse scálaí
 - tacair sonraí gheospásúla
 - graif, cairteacha agus staidreamh
- éifeachtacht na bhfiosruithe tíreolaíocha, lena n-áirítear ceist(eanna) nó fócas an fhiosrúcháin, modheolaíochtaí agus foinsí
- formáidí cumarsáide, lena n-áirítear léarscáileanna, graif, cairteacha, sceitsí, léaráidí, staidreamh, tacair sonraí gheospásúla
- ceisteanna eiticiúla lena n-áirítear feasacht chultúrtha

A4 ceisteanna tíreolaíocha a cheapadh**A5** fiosrúcháin thíreolaíocha a phleanáil agus a dhéanamh**A6** taighde a dhéanamh ar shonraí agus faisnéis thíreolaíoch agus modheolaíochtaí cuí á n-úsáid**A7** sonraí agus faisnéis thíreolaíoch a anailísiú agus a shintéisiú ó réimse foinsí cuí**A8** éifeachtacht an fhiosrúcháin thíreolaíoch a mheasúnú**A9** tuiscint, torthaí, conclúidí agus moltaí maidir leis an tíreolaíocht a chur in iúl go héifeachtach agus go heiticiúil

Snáithe 1: An timpeallacht fhisiciúil

I Snáithe 1, díríonn na scoláirí ar phróisis agus córais fhisiciúla, agus idirghníomhaíochtaí daonna. Glacfaidh na scoláirí páirt san fhoghlaim sa snáithe seo trí na suíomhanna a shonraítear sa tábla thíos agus trí shuíomhanna ábhartha áitiúla, Éireannacha, idirnáisiúnta agus/nó domhanda eile, mar is cuí. Le linn a staidéir ar Shnáithe 1, tiocfaidh na scoláirí ar an smaointeoireacht agus scileanna tíreolaíocha ón Snáithe Aontaitheach, agus cuirfidh siad i bhfeidhm iad ar bhealach comhtháite.

I Snáithe 1, forbraíonn na scoláirí a gcuid eolais ar phróisis na gníomhaíochta teicteonaí agus cuirfidh siad luach ar thorthaí tairbheacha agus diúltacha féideartha na

nguaiseacha nádúrtha. Measúnaíonn siad éifeachtacht straitéisí bainistíochta maidir le hullmhú agus freagairt ar chreathanna talún. Chomh maith leis sin, cuireann an snáithe seo deis ar fáil do na scoláirí smaoineamh ar thimthriall na gcarraigeacha. Scrúdóidh na scoláirí próisis dromchla agus iad ag forbairt a bhfeasachta ar timpeallachtaí abhann, cósta agus oighir, ar thionchair agus ar fhreagairtí bainistithe. Neartóidh siad a dtuiscint ar an aimsir trí staidéar a dhéanamh ar an atmaisféar agus ar thionchar na n-aigéan ar phróisis na haimsire. Fiosróidh siad criosanna aeráide, tionchar na haeráide ar bhithóm na hÉireann, agus déanfaidh siad réimse freagairtí inbhuanaithe ar an athrú aeráide a mheas.

Snáithe 1: Torthaí Foghlama

Foghlaimíonn na scoláirí faoin méid seo a leanas

Ba cheart go mbeadh sé ar chumas na scoláirí

Teicteonaic	
- tíreolaíocht dhomhanda plátaí litisféaracha - cineálacha teorainneacha plátaí: déanmhasach, claochlúcháin, scriosach - próisis lena n-áirítear sruthanna comhiompar, fodhuchtú, leathadh ghrinneall na farraige, foirmiú plátaí, agus tarraingt leaca - dhá shampla dhifriúla sliabhraonta, ceann amháin in Éirinn agus sampla idirnáisiúnta amháin - gníomhaíocht bholcánach agus na tírghnéithe a bhíonn mar thoradh uirthi - samplaí is infheidhme i suíomhanna Éireannacha agus idirnáisiúnta - thionchair dhearfacha agus dhiúltacha gníomhaíochta bolcánaí - cúiseanna agus éifeachtaí creathanna talún, cineálacha difriúla gluaiseachta plátaí ina measc - ullmhú agus freagairtí: gearrthéarmach agus fadtéarmach	1.1 míniú a thabhairt ar theicteonaic plátaí agus ar na próisis a thagann chun cinn ag cineálacha difriúla teorainneacha plátaí 1.2 scrúdú a dhéanamh ar fhoirmiú sliabhraonta trí phróisis fillte 1.3 scrúdú a dhéanamh ar an ngníomhaíocht bholcánach ag imill plátaí dhéanmhasacha agus scriosacha agus ag pointí te 1.4 tionchar eacnamaíoch, timpeallachta agus sóisialta gníomhaíochta bolcánaí i suíomh amháin sa Domhan Thuaidh agus suíomh amháin sa Domhan Theas a iniúchadh 1.5 plé a dhéanamh ar chúiseanna agus éifeachtaí creathanna talún i suíomh amháin sa Domhan Thuaidh agus suíomh amháin sa Domhan Theas 1.6 ullmhú do chreathanna talún agus freagairt orthu i suíomh amháin sa Domhan Thuaidh agus suíomh amháin sa Domhan Theas a mheasúnú

Timthriall na gcarraigeacha

- próisis thimthriall na gcarraigeacha a fhoirmíonn cineálacha éagsúla carraigeacha lena n-áirítear:
 - próisis ingineacha (meiteamorfacht, fuarú magma)
 - próisis eisigineacha (gníomhaíocht bholcánach, síonchaitheamh meicniúil agus ceimiceach, creimeadh agus litiú)
- suíomhanna in Éirinn do gach cineál carraige

1.7 breac-chuntas ar an gcaidreamh idir timthriall na gcarraigeacha agus foirmíocht charraige

Próisis dromchla

- timpeallachtaí fisiciúla: timpeallacht abhann, timpeallacht chósta agus timpeallacht oighreach
- dhá straitéis bainistíochta:
 - straitéis bainistíochta tuilte amháin
 - straitéis bainistíochta cósta amháin

1.8 an chaoi a n-imríonn próisis gheomoirfeolaíocha an chreimthe, an iompair agus an tsil-leagain tionchar ar thimpeallachtaí fisiciúla in Éirinn a anailísiú

1.9 plé a dhéanamh ar straitéisí bainistíochta tuilte agus cósta in Éirinn

An t-atmaisféar agus an aimsir

- na cúig scair (trópaisféar, strataisféar, méisisféar, teirmisféar, eisisféar)
- foirmiú córas ardbhrú agus lagbhrú (lena n-áirítear stoirmeacha):
 - dáileadh éagothrom grianradaíochta
 - cúrsaíocht dhomhanda an atmaisféir (iarmhairt Coriolis)
- saintréithe córas ardbhrú agus lagbhrú: teocht, frasaíocht agus gaoth

1.10 cur síos a dhéanamh ar struchtúr scaireach atmaisféar an Domhain

1.11 foirmiú agus saintréithe córas ardbhrú agus lagbhrú a bhfuil baint acu le hÉirinn a anailísiú

Aeráid

- criosanna aeráide, criosanna trópaiceacha, measartha, ilchríochacha, polacha agus tura san áireamh
- tionchar na haeráide ar ithreacha, flóra agus fána

1.12 sainathint criosanna aeráide éagsúla

1.13 an tionchar a bhíonn ag an aeráid ar shaintréithe bhithóm fhoraíoch bháistí measartha na hÉireann a anailísiú

- tionchar ar thimpeallachtaí fisiciúla agus daonna lena n-áirítear:
 - tírdhreacha reoite atá ag leá: oighearshruthanna, oighearchaidhpeanna agus talamh síorshiochta
 - cúrsaíocht aigéanach
 - arduithe ar leibhéal na farraige
 - tarluithe adhaimsire
 - cleachtais feirmeoireachta
 - imirce de bharr na haeráide
- samplaí Éireannacha agus idirnáisiúnta de gach tionchar infheidhme
- freagairtí lena n-áirítear:
 - comhaontuithe idirnáisiúnta
 - maolú lena n-áirítear gabháil carbóin agus laghdú ar astaíochtaí gas ceaptha teasa
 - oiriúnú atá dírithe ar leochaileacht i leith an athraithe aeráide a laghdú, lena n-áirítear córais réamhrabhaidh, agus bonneagar atá seasmhach ó thaobh na haeráide
- samplaí Éireannacha, idirnáisiúnta agus domhanda i gcás gach freagra infheidhme

1.14 iniúchadh a dhéanamh ar na héifeachtaí ón athrú aeráide ar thimpeallachtaí fisiciúla agus daonna

1.15 scrúdú a dhéanamh ar na freagairtí ar an athrú aeráide domhanda

Snáithe 2: An timpeallacht dhaonna

I Snáithe 2, díríonn na scoláirí ar phríomhghnéithe na geografaíochta daonna lena n-áirítear lonnaíocht dhaonna, daonra agus imirce. Glacfaidh na scoláirí páirt san fhoghlaim sa snáithe seo trí na suíomhanna a shonraítear sa tábla thíos agus trí shuíomhanna ábhartha áitiúla, Éireannacha, idirnáisiúnta agus/nó domhanda eile, mar is cuí. Le linn a staidéir ar Shnáithe 2, tiocfaidh na scoláirí ar na torthaí foghlama atá leagtha amach sa Snáithe Aontaitheach agus cuirfidh siad i bhfeidhm iad ar bhealach comhtháite.

I Snáithe 2, déanann na scoláirí a n-áiteanna áitiúla agus náisiúnta a mheas, lena n-áirítear tionchar áite ar ghníomhaíocht an duine, chomh maith le freagairtí inbhuanaithe ar na dúshláin atá roimh lonnaíochtaí tuaithe agus uirbeacha in Éirinn. Le Snáithe 2, éascaítear foghlaim na scoláirí freisin maidir le méid, dáileadh agus saintréithe an daonra. Faigheann na scoláirí feachtas ar chastacht na himirce, ar na tosca sóisialta, eacnamaíocha agus timpeallachta ag a mbíonn tionchar ar an imirce, agus ar thionchair na himirce.

Snáithe 2: Torthaí Foghlama

Foghlaimíonn na scoláirí faoin méid seo a leanas

Lonnaíocht an duine

- lonnaíochtaí tuaithe agus uirbeacha in Éirinn, lena n-áirítear samplaí áitiúla
- fianaise ar shuíomh, cás agus feidhm lonnaíochtaí i logainmneacha Gaeilge
- dáileadh lonnaíochtaí tuaithe, lonnaíocht líneach, scaipthe agus chnuasta san áireamh
- tosca fisiciúla agus daonna, lena n-áirítear ithir, draenáil, fóirithint, iompar agus seirbhísí eile, cóngarach do lonnaíochtaí eile
- freagairtí inbhuanaithe, lena n-áirítear straitéisí pleanála ar an leibhéal áitiúil agus náisiúnta, agus tionscnaimh phobalbhunaithe
- tosca a imríonn tionchar ar fhorbairt uirbeach: pleananna forbartha, fostaíocht, domhandú, soláthar seirbhíse
- tionchar na forbartha uirbí ar uaisliú, úsáid talún, timpeallachtaí nádúrtha agus tógtha agus soláthar seirbhíse, agus sraoilleáil uirbeach
- freagairtí lena n-áirítear caomhnú, athnuachan, athfhorbairt, éiceachathracha agus cathracha cliste

Ba cheart go mbeadh sé ar chumas na scoláirí

- 2.1** cur síos ar conas is féidir lonnaíochtaí daonna a shainmhíniú de réir suímh, cáis agus feidhme
- 2.2** na tosca a théann i bhfeidhm ar dháileadh na lonnaíochtaí tuaithe in Éirinn a mhíniú
- 2.3** freagairtí inbhuanaithe a phlé maidir leis na dúshláin atá roimh lonnaíochtaí tuaithe in Éirinn
- 2.4** na tosca a théann i bhfeidhm ar fhorbairt uirbeach a mhíniú
- 2.5** freagairtí a phlé maidir le tionchair na forbartha uirbí i gcathair amháin de chuid na hÉireann

Daonra agus imirce

- tosca lena n-áirítear coimhlint, cultúr, bia, comhionannas inscne, sláinte, tírdhreach fisiciúil agus acmhainní nádúrtha
- tosca a imríonn tionchar ar rátaí beireatais agus ar an aosú, comhionannas inscne, imirce agus bánú na tuaithe
- tosca lena n-áirítear an stair choilíneach, coimhlint, an t-athrú aeráide, cultúr, déimeagrafaíocht, geilleagar, agus beartas rialtais
- Éire mar thír ghlactha agus tír bhronntach
- tionchair lena n-áirítear caidrimh phobail, éagsúlacht, fostaíocht, soláthar seirbhíse agus seoltáin

2.6 cur síos a dhéanamh ar thionchar tosca difriúla ar mhéid agus dáileadh an daonra in Éirinn agus i dtír amháin eile sa Domhan Theas

2.7 scrúdú a dhéanamh ar shaintréithe struchtúr an daonra in Éirinn, lena n-áirítear a suíomh áitiúil, agus i dtír amháin sa Domhan Theas

2.8 tionchar athrú an daonra a anailísiú in Éirinn, lena n-áirítear a suíomh áitiúil, agus i dtír amháin sa Domhan Theas

2.9 na tosca a imríonn tionchar ar an imirce idirnáisiúnta a phlé

2.10 tionchair na himirce in Éirinn, lena n-áirítear a suíomh áitiúil, a mhíniú

Snáithe 3: An timpeallacht dhomhanda

I Snáithe 3, díríonn na scoláirí ar an talmhaíocht agus iascaigh, an turasóireacht, an domhandú, forbairt agus geopholaitíocht. Glacfaidh na scoláirí páirt san fhoghlaím sa snáithe seo trí na suíomhanna a shonraítear sa tábla thíos agus trí shuíomhanna ábhartha áitiúla, náisiúnta, idirnáisiúnta agus/nó domhanda eile, mar is cuí. Le linn a staidéir ar Shnáithe 3, tiocfaidh na scoláirí ar na torthaí foghlama atá leagtha amach sa Snáithe Aontaitheach agus cuirfidh siad i bhfeidhm iad ar bhealach comhtháite.

I Snáithe 3, déanann na scoláirí tábhacht agus athrú staid na talmhaíochta agus iascach in Éirinn a mheas, chomh maith le tionchar bheartais an Aontais Eorpaigh

(AE) ar an tionscal talmhaíochta agus an tionscal iascaireachta araon. Déanann sé staidéar ar an turasóireacht in Éirinn agus cuireann sé lena thuiscint ar an ollturasóireacht. Smaoiníonn na scoláirí faoi na tosca a imríonn tionchar ar an domhandú, ceithre shaoirse an Aontais Eorpaigh agus tionchar an domhandaithe ar Corparáid Ilnáisiúnta (CIN) amháin in Éirinn. Pléann siad le cuir chuige agus tomhas na forbartha, agus le cúnamh forbartha agus clár comhoibrithe Rialtas na hÉireann. Fiosraíonn na scoláirí tábhacht na geopholaitíochta agus smaoiníonn ar an ngeopholaitíocht ag obair trí staidéar ar aighneas críche.

Snáithe 3: Torthaí Foghlama

Foghlaímíonn na scoláirí faoin méid seo a leanas

Talmhaíocht agus iascaigh

- tosca eacnamaíocha, timpeallachta agus sóisialta a imríonn tionchar ar an talmhaíocht
- cleachtais talmhaíochta a bhíonn ag athrú, lena n-áirítear diansaothrú, cuir chuige orgánacha, táirgeadh bia uirbeach, agus úsáid teicneolaíochta
- athruithe sa tionscal iascaireachta: forbairt do bharshaothraithe, iascaigh intíre agus caomhnú
- beartais an Aontais Eorpaigh a bhaineann le talmhaíocht agus iascaigh

An Turasóireacht

- nithe is díol spéise do thurasóirí
- bonneagar turasóireachta
- patrúin agus treochtaí lena n-áirítear an líon cuairteoirí agus ioncam
- tionchair dhearfacha agus dhiúltacha na hollturasóireachta maidir leis an eacnamaíocht, an timpeallacht agus an tsochaí

Ba cheart go mbeadh sé ar chumas na scoláirí

- 3.1** scrúdú a dhéanamh ar thábhacht agus nádúr athraitheach na talmhaíochta in Éirinn
- 3.2** athruithe sa tionscal iascaireachta in Éirinn a fhiosrú
- 3.3** tionchar bheartais an Aontais Eorpaigh ar an talmhaíocht agus ar iascaigh in Éirinn a phlé
- 3.4** patrúin agus treochtaí a bhaineann leis an turasóireacht in Éirinn a anailísiú
- 3.5** iniúchadh a dhéanamh ar fhorbairt agus tionchair na hollturasóireachta i suíomh cósta Meánmhara amháin

Domhandú

- tosca a imríonn tionchar ar an domhandú: teicneolaíocht dhigiteach, airgeadas, taighde agus forbairt, beartais chánach agus iompar
- deiseanna agus dúshlán a thagann chun cinn le ceithre shaoirse an Aontais Eorpaigh (saorghluaiseacht earraí, seirbhísí, caipitil, agus saothair)
- tosca lena n-áirítear rochtain ar bhonneagar agus seirbhísí, margaí, saolré táirge, amhábhair, lucht saothair oilte, beartais maidir le trádáil agus cánacha

3.6 tosca a bhfuil tionchar acu ar an domhandú a fhiosrú**3.7** ceithre shaoirse an Aontais Eorpaigh a anailísiú**3.8** iniúchadh a dhéanamh ar na tosca a imríonn tionchar ar shuíomh Corparáide Innáisiúnta (CIN) amháin in Éirinn**Cúnamh forbartha agus comhoibriú**

- cuir chuige lena n-áirítear Caomhnaitheacht, Nuachóiriú agus Forbairt Inbhuanaithe
- bearta lena n-áirítear an Olltáirgeacht Intíre (OTI), an tOllioncam Náisiúnta (OIN), an tInnéacs um Fhorbairt Dhaonna (IFD) agus an tInnéacs Forbartha de réir Inscne (IFI)
- gnéithe an IFD (saol fada agus folláin, eolas agus caighdeán maireachtála fóna)
- tosca lena n-áirítear an t-athrú aeráide, stair choilíneach, coimhlint agus síocháin, fiacha agus trádáil, beartais rialtais, agus tírdhreach fisiciúil
- cúnamh daonnúil mar fhreagairt ar ghéarchéim dhaonnúil amháin
- comhoibriú forbartha thar lear i dtír amháin sa Domhan Theas

3.9 breac-chuntas a thabhairt ar chuir chuige chun forbairt a mheasúnú agus a thomhas**3.10** an chaoi a n-imríonn tosca éagsúla tionchar ar ghnéithe IFD in Éirinn agus tír amháin eile sa Domhan Theas a anailísiú**3.11** scrúdú a dhéanamh ar chúnamh daonnúil Rialtas na hÉireann agus a chlár comhoibrithe maidir le forbairt thar lear**An Gheopholaitíocht**

- an gheopholaitíocht mar idirnasc idir an tíreolaíocht, an déimeagrafaic, an eacnamaíocht, an timpeallacht agus an pholaitíocht
- tionchar sárchumhachtaí: cumhacht chrua agus cumhacht bhog
- aighneas críche geopholaitiúil: ar talamh, ar muir nó san aerspás
- na gníomhaithe atá páirteach san aighneas críche roghnaithe
- cúiseanna, tionchair agus freagairtí molta nó curtha i gcrích maidir leis an aighneas críche roghnaithe

3.12 coincheap agus ábharthacht na geopholaitíochta a fhiosrú**3.13** breac-chuntas a thabhairt ar shárchumhachtaí sa gheopholaitíocht**3.14** aighneas críche geopholaitiúil a iniúchadh

Teagasc le haghaidh fhoghlaím an scoláire

I dTíreolaíocht na hArdteistiméireachta, tá an fhoghlaím sa Snáithe Aontaitheach mar bhonn faoi eispéireas na scoláirí: Smaointeoireacht agus scileanna tíreolaíocha a chur i bhfeidhm. Ciallaíonn sé sin go bpleanálfar go cúramach eolas, scileanna, luachanna agus meonta an disciplín a dtugtar breac-chuntas orthu sna torthaí foghlama sa Snáithe Aontaitheach agus déanfar iad a chomhtháthú in eispéireas foghlama na scoláirí sna trí shnáithe chomhthéacsúla i rith an dá bhliain staidéir.

Cuimsítear leis an Snáithe Aontaitheach deiseanna maidir le raon leathan cur chuige foghlama agus teagaisc, lena n-áirítear iad siúd a chothaíonn forbairt cruinneshamhla tíreolaíche. Trí na hoideolaíochtaí sin, tacófar leis na scoláirí ábharthacht na tíreolaíochta a thuiscint agus príomhchoincheapa na tíreolaíochta a chur i bhfeidhm, ceisteanna tíreolaíocha a chur, agus páirt a ghlacadh i scrúdú agus cruthú sonraí agus faisnéise tíreolaíche, lena n-áirítear léarscáileanna, grianghraif agus íomhánna, graif, cairteacha, staidreamh agus tacair shonraí gheospásúla.

Bainfear úsáid as cuir chuige foghlama agus teagaisc a thacóidh leis na scoláirí fiosrúcháin thíreolaíocha a phleanáil, a chur i gcrích, a anailísiú, a mheasúnú agus a chur in iúl ar fud an tsnáithe. Trí chomhtháthú éifeachtach na foghlama seo ar fud na sonraíochta, agus trí thús áite a thabhairt don fhoghlaím amuigh faoin aer agus d'obair allamuigh, beidh deiseanna ag na scoláirí príomhinniúlachtaí éagsúla a shealbhú agus eolas teoiriciúil a chur i bhfeidhm i gcomhthéacsanna sa saol réadúil. Dá réir sin, trí na heispéiris phraiticiúla seo, éireoidh coincheapa teibí níos inbhraite, agus neartóidh na scoláirí a gcumas an smaointeoireacht agus scileanna tíreolaíocha a úsáid agus iad i mbun dúshláin agus freagairtí tíreolaíocha a mheas.

Tá na scoláirí i gcoirlár Thíreolaíocht na hArdteistiméireachta. Le cois chomhtháthú na dtorthaí foghlama sa Snáithe Aontaitheach, tá nascanna i ngach ceann de na trí shnáithe chomhthéacsúla agus eatarthu freisin, agus déanfar na nascanna sin a fhiosrú in ord agus ar bhealach atá inrochtana agus ábhartha do gach scoláire. Mar shampla, dá ndíreofaí ar líon teoranta suíomhanna ar fud na dtorthaí foghlama i snáithe

amháin nó níos mó ná sin, d'fhéadfadh sé cabhrú le tuiscint áite níos caolchúisí a fhorbairt fad a bhíonn an fhoghlaím fós indéanta ag na scoláirí. Bainfear amach an ionchuimsitheacht chomh maith trína chinntiú go bhfuil an t-inneachar ábhartha d'eispéiris agus do shaol gach scoláire. Ba cheart suíomhanna agus samplaí áitiúla a úsáid, nuair atáthar ar fáil agus infheidhme, chun an fhoghlaím sna torthaí a léiriú. Leis sin, agus leis an mbéim ar an bhfoghlaím amuigh faoin aer agus ar an obair allamuigh i suíomhanna áitiúla, tacófar le rochtain agus suim na scoláirí maidir le foghlaim ábhartha agus mhealltach na foghlama tíreolaíochta. Trí úsáid a bhaint as réimse uirlisí agus acmhainní tíreolaíocha, teicneolaíochtaí geospásúla san áireamh, déanfar foghlaim Thíreolaíocht na hArdteistiméireachta níos dinimiciúla. Tacóidh sé sin leis na scoláirí tabhairt faoin bhfoghlaím agus í a chur in iúl ar bhealaí éagsúla.

Spreagfar na scoláirí le dul i ngleic leis an smaointeoireacht thíreolaíoch agus eolas a thabhairt le chéile, aiseolas a thabhairt agus a fháil agus na smaointe nua a chur san áireamh nó a leasú. Tacófar leis na scoláirí rochtain a fháil ar an gcineál foghlama a oireann dá riachtanais éagsúla ar leith. Beidh éileamh difriúil le sonrú i ngach gníomhaíocht foghlama toisc go mbíonn smaointe agus tuiscint dhifriúil ag gach scoláire. Dá réir sin, cuirfear an ionchuimsitheacht chun cinn trí úsáid a bhaint as straitéisí, amhail méid agus cineál idirghabháil an mhúinteora a athrú agus luas agus ord na foghlama a athrú.

I dTíreolaíocht na hArdteistiméireachta, beidh deiseanna ag na scoláirí obair ina n-aonar nó i gcomhar le scoláirí eile, sa seomra ranga agus amuigh faoin aer araon. Leis an bpiarfhoghlaim agus le measúnú neartófar a scileanna criticiúla, anailíseacha agus tíreolaíocha in éineacht lena scileanna idirphearsanta agus cumarsáide. Beidh aiseolas leanúnach agus cuiditheach ón múinteoir agus ó phiaraí, chomh maith le deiseanna struchtúrtha chun machnamh a dhéanamh ar an bhfoghlaím fite fuaite sa phróiseas foghlama. Leis an machnamh tacófar leis na scoláirí a láidreachtaí a shainathint, chomh maith le réimsí inar cheart dóibh iad féin a fheabhsú, chun meon foráis a chothú.

Measúnú

Baineann measúnú sa tsraith shinsearach le faisnéis faoi phróisis agus faoi thorthaí foghlama a bhailiú, a léirmhíniú, a úsáid agus a thuairisciú. Tá foirmeacha éagsúla measúnaithe ann agus úsáidtear é ar chúiseanna difriúla. Baintear úsáid as measúnú chun an tslí chuí a fháil amach na scoláirí trí churaclam éagsúil, chun sainréimsí láidreachta nó deacrachta scoláire áirithe a shainaithint agus chun gnóthachtáil a thástáil agus a theistiú. Is tacaíocht don fhoghlaim é an measúnú agus cuireann sé chun feabhais í trí chabhrú leis na scoláirí agus leis na múinteoirí na chéad chéimeanna eile sa phróiseas teagaisc agus foghlama a shainaithint.

Chomh maith le straitéisí éagsúla teagaisc, tacóidh straitéisí éagsúla measúnaithe le foghlaim an scoláire agus soláthróidh siad faisnéis do na múinteoirí agus do na scoláirí atá inúsáidte mar aiseolas, sa chaoi is gur féidir gníomhaíochtaí teagaisc agus foghlama a chur in oiriúint do riachtanais an fhoghlaimeora aonair. De thoradh tascanna atá cuí agus mealltach a leagan síos, ceisteanna a chur agus aiseolas a thabhairt a chuireann neamhspleáchas an fhoghlaimeora chun cinn, tacóidh an measúnú leis an bhfoghlaim agus leis an dul chun cinn, chomh maith le tacaíocht a thabhairt d'fhorbairt phríomhinniúlachtaí an scoláire agus coimriú a thabhairt ar an ngnóthachtáil.

Measúnú don teistiúchán

Tá an measúnú don teistiúcháin bunaithe ar an réasúnaíocht, ar chuspóirí agus ar thorthaí foghlama na sonraíochta seo. Tá dhá chomhpháirt mheasúnaithe ann: scrúdú scríofa agus comhpháirt mheasúnaithe sa bhreis a bhfuil Tionscadal Tíreolaíochta Feidhmí i gceist léi. Beidh an scrúdú scríofa ar ardleibhéal agus gnáthleibhéal. Bunófar an Tionscadal Tíreolaíochta Feidhmí ar threoir chomónta. Is é Coimisiún na Scrúduithe Stáit (CSS) a dhéanfaidh gach comhpháirt a leagan amach agus a scrúdú.

I ndáil leis an scrúdú scríofa, déanfar Tíreolaíocht na hArdteistiméireachta a mheasúnú ar dhá leibhéal – Ardleibhéal agus Gnáthleibhéal (Tábla 1). Éileoidh na ceisteanna scrúdaithe go léireoidh na scoláirí foghlaim atá cuí don leibhéal. Beidh idirdhealú le sonrú sa mheasúnú freisin tríd an ábhar spreagthach a úsáidtear, agus trí mhéid na tacaíochta struchtúrtha a thugtar do na scoláirí atá i mbun scrúduithe ag leibhéil dhifriúla.

Comhpháirt mheasúnaithe	Ualú	Leibhéal
Tionscadal Tíreolaíochta Feidhmí	40%	Treoir chomónta
Scrúdú scríofa	60%	Ardleibhéal agus Gnáthleibhéal

Tábla 2: Achoimre an mheasúnaithe i gcomhair teistiúcháin

Comhpháirt Mheasúnaithe sa Bhreis (CMB): Tionscadal Tíreolaíochta Feidhmí

Leis an Tionscadal Tíreolaíochta Feidhmí cuirtear deis ar fáil do na scoláirí fianaise ar a gcuid foghlama ar fud na sonraíochta a thaispeáint, is é sin le rá, an fhoghlaím atá leagtha amach sa Snáithe Aontaitheach a chur i bhfeidhm agus a thaispeáint i gcomhthéacs ceann amháin nó níos mó de na trí shnáithe chomhthéacsúla. Déanfar príomhinniúlachtaí na sraithe sinsearaí agus scileanna tíreolaíocha, atá neadaithe i bhfoghlaím Thíreolaíocht na hArdteistiméireachta, a chur i bhfeidhm trí rannpháirtíocht na scoláirí sa Tionscadal Tíreolaíochta Feidhmí.

Tá an Tionscadal Tíreolaíochta Feidhmí ceaptha le bheith comhtháite go nádúrtha i sreabhadh na foghlama agus an teagasc agus leas á bhaint as cumhacht an tionscadail chun na scoláirí a spreagadh.¹ Trí rannpháirteachas sa Tionscadal Tíreolaíochta Feidhmí tacaítear leis na scoláirí ábharthacht na tíreolaíochta dá saol a thuiscint chomh maith.

Leis an Tionscadal Tíreolaíochta Feidhmí a chur i gcrích déanfaidh na scoláirí fiosrúchán de réir inneachar agus ceanglais threoir CSS. Is é a bheidh i gceist leis sin ná taighde a dhéanamh ar réimse a bhaineann le hinneachair na treorach. Déanfaidh siad a bhfiosrúchán a phleanáil agus a chur i gcrích. Baileoidh agus anailíseoidh siad sonraí, rud a chuirfidh lena bhfoghlaím agus a chuideoidh leo tátail eolacha a bhaint astu agus a chur in iúl.

Treoir an Tionscadail Tíreolaíochta Feidhmí

Cuireann na scoláirí a Thionscadal Tíreolaíochta Feidhmí i gcrích de réir na treorach comhchoitinne a eiseoidh Coimisiún na Scrúduithe Stáit (CSS). Foilseoidh CSS an treoir seo gach bliain. Chomh maith le ceanglais shonracha an Tionscadail Tíreolaíochta Feidhmí a leagan amach, déanfar an méid a leanas sa treoir:

- tacófar leis na scoláirí le machnamh a dhéanamh ar réimsí a bhaineann leis an treoir agus ar mhian leo iniúchadh a dhéanamh orthu
- tacófar leis an múinteoirí agus iad ag pleanáil don fhoghlaím and don teagasc
- d'fhéadfadh sí tacú leis na scoláirí acmhainní a bhailiú a bhféadfaidh siad leas a bhaint astu agus iad ag críochnú a gComhpháirte Measúnaithe sa Bhreis.

Ar chur i gcrích an tionscadail, cuirfidh na scoláirí tuairisc aonair ar fáil ar a Thionscadal Tíreolaíochta Feidhmí i bhformáid atá leagtha síos ag CSS.

Bíonn ardleibhéal neamhspleáchais ag scoileanna chun cur i gcrích an Tionscadail Tíreolaíochta Feidhmí a phleanáil agus a eagrú. Tugann cáipéis ar leith, *Treoirlínte maidir leis an Tionscadal Tíreolaíochta Feidhmí*, treoir maidir le raon ábhar a bhaineann le heagrú, cur i bhfeidhm agus maoirseacht na Comhpháirte Measúnaithe sa Bhreis seo.

¹ Meastar go dtógfaidh an Chomhpháirt Mheasúnaithe sa Bhreis suas le 20 uair an chloig lena cur i gcrích. Cuirfear sonraí breise ar fáil sna *Treoirlínte chun tacú le Tionscadal Tíreolaíochta Feidhmí Thíreolaíocht na hArdteistiméireachta*.

Tuairisceoirí cáilíochta don chomhpháirt mheasúnaithe sa bhreis

Baineann na tuairisceoirí thíos leis an bhfoghlaim a bhaineann na scoláirí amach sa Tionscadal Tíreolaíochta Feidhmí. Éilíonn an tionscadal, go háirithe, go ndéanfaidh na scoláirí an méid seo a leanas:

- A bhfiosrúchán a phleanáil agus a chur i gcrích
- Anailís agus cumarsáid
- Measúnú agus machnamh.

	Scoláirí a léiríonn leibhéal ard gnóthachtála	Scoláirí a léiríonn leibhéal measartha gnóthachtála	Scoláirí a léiríonn leibhéal íseal gnóthachtála
A bhfiosrúchán a phleanáil agus a chur i gcrích	plé go mion le coincheapa ábhartha. Raon leathan sonraí a mheas agus a phlé ar bhealach éifeachtach. Modheolaíochtaí bailithe sonraí, atá cuí agus a bhfuil cúis leo, a roghnú agus a chur i bhfeidhm go héifeachtach.	dea-rannpháirtíocht le coincheapa ábhartha. Raon sonraí a mheas agus a phlé. Modheolaíochtaí bailithe sonraí atá cuí a roghnú agus a chur i bhfeidhm ar bhealach réasúnta éifeachtach.	plé teoranta a dhéanamh le coincheapa. Raon sonraí a mheas agus a phlé ar bhealach teoranta. Modheolaíochtaí bailithe sonraí, nár roghnaíodh go maith, a úsáid le héifeacht theoranta.
Anailís agus cumarsáid	anailís mhionsonraithe a dhéanamh ar a dtorthaí. Cumarsáid a dhéanamh ar fud an tsnáithe ar an mbealach is soiléire agus is cuimsithí, agus teanga sheasmhach agus chiallmhar á húsáid. Téarmaíocht thíreolaíoch a úsáid go cuí agus ar bhealach atá ábhartha. Sonraí, eolas, agus anailís shoiléir agus chuí a chur i láthair trí úsáid a bhaint as réimse grafaicí ábhartha nuair is cuí.	anailís a dhéanamh ar a dtorthaí. Cumarsáid ghinearálta a dhéanamh ar bhealach soiléir agus cuimsitheach ar fud an tsnáithe, den chuid is mó, agus teanga réasúnta seasmhach agus chiallmhar á húsáid. Roinnt téarmaíocht tíreolaíoch a úsáid go cuí agus ar bhealach atá ábhartha. Sonraí, eolas agus anailís shásúil a chur i láthair, agus úsáid á baint as grafaicí ábhartha nuair is cuí.	beagán anailíse nó gan anailís ar bith a dhéanamh ar dtorthaí. Doiléir agus teoranta ina gcumarsáid i gcoitinne, agus teanga neamhsheasmhach agus dhothuigthe á húsáid aige. Téarmaíocht thíreolaíoch a úsáid go hannamh nó ar bhealach nach bhfuil cuí ná ábhartha. Sonraí, eolas agus anailís theoranta a chur i láthair, gan mórán nó gan aon úsáid as grafaicí.
Measúnú agus machnamh	measúnú cúramach agus machnamh a dhéanamh ar fud an tionscadail agus smaoineamh go mion ar an dóigh a mbaineann a dtorthaí le comhthéacs ar leith nach fócas a bhfiosrúcháin é.	roinnt measúnaithe agus machnaimh a dhéanamh ar fud an tionscadail agus smaoineamh ar an dóigh a mbaineann a dtorthaí le comhthéacs ar leith nach fócas a bhfiosrúcháin é.	measúnaithe agus machnamh teoranta a dhéanamh in amanna le linn an tionscadail agus smaoineamh ar bhealach teoranta ar an dóigh a mbaineann a dtorthaí le comhthéacs ar leith nach fócas a bhfiosrúcháin é.

Tábla 3: Tuairisceoirí cáilíochta: Tionscadal Tíreolaíochta Feidhmí

Scrúdú scríofa

Beidh raon cineálacha ceisteanna sa scrúdú scríofa. Tá príomhinniúlachtaí na sraithe sinsearaí (Fíor 2, leathanach 6) fite fuaite sna torthaí foghlama agus déanfar iad a mheasúnú i gcomhthéacs na dtorthaí foghlama. Cuimseofar rogha ceisteanna leis an scrúdpháipéar ina ndéanfar an méid seo a leanas a mheasúnú ag an leibhéal cuí:

- an fhoghlaim a ndéantar cur síos uirthi sa Snáithe Aontaitheach agus sna trí shnáithe chomhthéacsúla
- cur i bhfeidhm na smaointeoireachta tíreolaíche maidir le dúshláin agus freagairtí sa domhan réadúil.

Socruithe réasúnta

Éilíonn an tsonraíocht seo do Thíreolaíocht na hArdteistiméireachta go rachaidh na scoláirí i ngleic le nádúr an ábhair ar bhonn leanúnach i rith an chúrsa. Tá dhá chuid ag baint leis an measúnú don teistiúchán i dTíreolaíocht na hArdteistiméireachta: scrúdú scríofa ar fiú 60% de na marcanna ar fad é agus comhpháirt bhreise ar fiú 40% í. Sa chomhthéacs sin, tá scéim na Socruithe Réasúnta/Ionchuimsithe i bhfeidhm ag Coimisiún na Scrúduithe Stáit (CSS), scéim a ceapadh chun cuidiú le scoláirí a mbeadh deacracht acu an scrúdú a rochtain nó an méid atá ar eolas acu a chur in iúl do scrúdaitheoir mar gheall ar dheacracht fhisiceach, amhairc, chéadfach, éisteachta nó foghlama. Cuidíonn an scéim seo leis na scoláirí sin an méid atá ar eolas acu agus an méid atá siad in ann a dhéanamh a léiriú gan cur isteach ar chaighdeán an mheasúnaithe. Dirítear sa scéim ar bhacainní ar rochtain a bhaint, agus an gá atá leis an eolas, na scileanna, na luachanna agus na meonta bunúsacha céanna a mheas a dhéantar a mheasúnú do gach scoláire eile, agus na caighdeáin chéanna gnóthachtála a chur i bhfeidhm is atá i bhfeidhm maidir le gach scoláire eile. Déanann an Coimisiún gach iarracht le linn dó an scéim seo a chur i bhfeidhm chun freastal ar riachtanais mheasúnaithe aonair trí na hoiriúntais seo.

Bíonn cúinsí ann inar féidir an riachtanas chun réimsí foghlama ar leith a thaispeáint, agus measúnú á dhéanamh ar na scoláirí le haghaidh teastasú, a tharscaoileadh nó a dhíolmhú, a fhad nach gcuirfidh sé isteach ar shláine iomlán an mheasúnaithe.

Tá faisnéis níos mionsonraithe faoi scéim na Socruithe Réasúnta/Ionchuimsithe sna Scrúduithe Teastais, lena n-áirítear na socruithe atá ar fáil agus na cúinsí ina bhféadfaidís a bheith i bhfeidhm, ar fáil ó Roinn na Socruithe Réasúnta/Ionchuimsithe de chuid Choimisiún na Scrúduithe Stáit.

Sula gcinneann scoláirí staidéar a dhéanamh ar Thíreolaíocht na hArdteistiméireachta, i gcomhairle lena scoil agus lena dtuismitheoirí/gcaomhnóirí, ba cheart dóibh athbhreithniú a dhéanamh ar thorthaí foghlama na sonraíochta seo agus ar mhionsonraí na socruithe measúnaithe. Ba cheart dóibh machnamh a dhéanamh go cúramach, lena fháil amach an mbeidh siad in ann na torthaí foghlama a bhaint amach, nó an bhfuil riachtanas speisialta oideachais acu a fhágann nach mbeidís in ann a léiriú go bhfuil na torthaí bainte amach acu, fiú tar éis na socruithe réasúnta a chur i bhfeidhm. Más rud é go gcreideann an scoil go mb'fhéidir nach mbeadh scoláire in ann páirt iomlán a ghlacadh sna socruithe measúnaithe don teistiúchán, tá sé riachtanach go ndéanann siad teagmháil le Coimisiún na Scrúduithe Stáit.

Grádú na hArdteistiméireachta

Déanfar Tíreolaíocht na hArdteistiméireachta a ghrádú le scála grádúcháin 8 bpointe. Is é Grád 1 an grád is airde; is é Grád 8 an grád is ísle. Tá marcanna céatadáin idir 100% agus 30% i gceist leis na seacht ngrád is airde (1–7). Tá na gráid roinnte ina raonta cothroma atá 10% ar leithead. Bronntar Grád 8 as marcanna céatadáin níos lú ná 30%. Déantar idirdhealú idir gráid an Ardleibhéil agus gráid an Ghnáthleibhéil trí A nó G a chur roimh an ngrád faoi seach. Dá bhrí sin, tá A1–A8 i gceist ag an Ardleibhéal agus tá G1–G8 i gceist leis an nGnáthleibhéal.

Grád	Marcanna %
A1/G1	90 – 100
A2/G2	80 < 90
A3/G3	70 < 80
A4/G4	60 < 70
A5/G5	50 < 60
A6/G6	40 < 50
A7/G7	30 < 40
A8/G8	< 30

Tábla 4: Grádú na hArdteistiméireachta

Aguisín 1: Gluais de bhriathra gnímh

Cuireadh an ghluais seo i dtoll a chéile chun na torthaí foghlama a shoiléiriú. Déantar cur síos ar gach briathar gnímh i dtéarmaí na rudaí ba cheart a bheith ar chumas na scoláirí ach an toradh foghlama a bhaint amach.

Briathar gnímh	Ba cheart go mbeadh sé ar chumas na scoláirí
Aithin	fíricí, saintréithe nó coincheapa atá riachtanach (ábhartha/oiriúnach) chun cás, imeacht, próiseas nó feiniméan a thuiscint a shainaithint
Anailísigh	staidéar nó scrúdú a dhéanamh ar rud go mion, rud a mhiondealú chun na bunghnéithe nó an bunstruchtúr a nochtadh; codanna agus coibhneasa a shainaithint, agus fianaise a léirmhíniú chun teacht ar chonclúidí
Ceap	na coincheapa nó na hargóintí cuí a chur in iúl go beacht agus go córasach
Cuir in iúl	leaganacha amach cuí a úsáid chun brí a chomhroinnt, malartú a dhéanamh nó eolas a chur i láthair le pobal
Cuir síos	pictiúr nó íomhá mhionsonraithe a fhorbairt ar struchtúr nó ar phróiseas, mar shampla, ag úsáid focal nó léaráidí mar is cuí; plean, ionsamhlú nó samhail a tháirgeadh
Déan	tabhairt faoi ghníomhaíocht
Déan taighde	sainfhiosrú a dhéanamh, ag úsáid iniúchadh casta agus criticiúil
Fiosraigh	breathnaigh, déan staidéar, d'fhonn fíricí a chruthú
Iniúch	breathnú, staidéar, nó mionscrúdú córasach a dhéanamh, chun fíricí a chinntiú agus teacht ar chonclúidí nua
Léirthuiscint a bheith ag... do...	an bhrí, an luach nó an tábhacht atá le rud a aithint
Measúnaigh (breithiúnas eiticíúil)	fianaise a bhailiú agus a scrúdú chun breithiúnais agus breithmheas a dhéanamh; cur síos a dhéanamh ar an gcaoi a dtacaíonn nó nach dtacaíonn fianaise le breithiúnas; srianta fianaise i gconclúidí a shainaithint; breithiúnais a dhéanamh faoi na smaointe, faoi réitigh nó faoi mhodhanna
Measúnaigh (sonraí)	sonraí a bhailiú agus a scrúdú chun breithiúnais agus breithmheas a dhéanamh; cur síos a dhéanamh ar an gcaoi a dtacaíonn nó nach dtacaíonn fianaise le conclúid i bhfiosrúchán nó in iniúchadh; srianta sonraí i gconclúidí a shainaithint; breithiúnais a dhéanamh faoin smaoineamh, faoi réitigh nó faoi mhodhanna
Mínigh	mionchuntas a thabhairt arna thacú le fáthanna nó cúiseanna
Pleanáil	modh nó cur chuige a cheapadh nó a bheartú
Pléigh	athbhreithniú tomhaiste cothrom a thabhairt a chuimsíonn réimse argóintí, peirspictíochtaí, tosca nó hipitéisí atá bunaithe ar fhianaise chuí
Sainaithin	patrúin, fíricí nó sonraí a aithint; freagra a sholáthar ó roinnt féidearthachtaí; fíoras nó gné shainiúil a aithint agus a lua go hachomair
Scrúdaigh	breathnú go grinn ar argóintí, coincheapa, sonraí, faisnéis, agus/nó scéalta d'fhonn bunús, barúlacha, peirspictíochtaí, treochothaí agus/nó caidrimh a nochtadh
Sintéisigh	smaointe difriúla, sonraí, faisnéis agus/nó eolas a thabhairt le chéile, san fhoirm scríofa nó i bhfoirm eile, chun smaoineamh nua nó tuiscint níos doimhne a chruthú
Tabhair breac-chuntas	na príomhphointí a thabhairt, gan ach na píosaí faisnéise riachtanacha a thabhairt
Taispeáin	na príomhphointí a thabhairt, gan ach na píosaí faisnéise riachtanacha a thabhairt



An Roinn Oideachais
agus Óige
Department of Education
and Youth

Published August 2025.